

## ■ UNIVERSITÂT DAL FRIÛL *Atestâts a 59 corsiscj*

A son stâts 59 i corsiscj che, superât l'esam finâl, a àn cjapât l'atestât di partecipazion ae cuarthe edizion dai cors di lenghe furlane prontâts dal Centri interdipartimentâl di ricercje su la culture e la lenghe dal Friûl (Cirf) de Universitât dal Friûl. I plui brâfs a son stâts propi doi dipendents dal Ateneu. La consegne dai atestâts e je stade fate vinars ai 15 di Jugn inte sale dal Consei di Palaç Florio a Udin. Aes lezions in marilenghe, che si son tignudis tes sedis de Universitât a Udin e Pordenon, a àn cjapât part dipendents des amministrazioni publichis, ma ancje architets, gjeometris, gjornaliscj, inzegnîrs, students, ancje un citadin ongjarês. I cors, gratuits e su cinc nivei, de durade di 30 oris ognidun, a son destinâts ai dipendents des amministrazioni publichis, ma dut cês a son vierts a ducj i interessâts tant che uditôrs. La iniziative e je stade inmaneade cui fonts de leç 482/99 su la tutele des minorancis linguistichis storichis. L'obietif dai cors al è chel di dâ continuitât di bande dal Ateneu ae formazion linguistiches di meti in vore tal ambient lavoratîf, e in particolâr, intai ents publicis.